

Endenquimbo, diez de diciembre, 1948, nidaid abitedinoësh matses utsi-utsiec cho-chopanëdash, onquenuec. Adec cho-choquid Naciones Unidas capec.

Choashic onquepanëdash. - Bëdamboec tabadnuna, quequin chuibanuna. Nuqui chuiboed dada uanuna. Nuqui dada uaid daëdpen nacenashun meniac utsibo abitedishun nuqui chuiboed tantiatsiashe - quepanëdash cho-choquido. Ambi chiaid neid dada uaid nec.

Nidaid Abitedinoësh Cho-choquidon Bëdamboec Tabadte Chiaid

Utsi Chuinuen Naden chuinëdash

Adashic: - Bëdamboec tabadnuna, qesho: Ai, mimbi chiac padec tabadnuna, matses abitedimbo chuinanubi:

Mibi bëdamboec tabashobi cueschitono, quequid nibedtsiash. Cuesnanenquio matses ictsiash. Icsauanquid chushcatsiash. Bëdambocquid bëdamboen ispatsiash - quequin chuipanëdash nidaid abitedinoësh cho-choquidon.

Adashic: - Enden: Bëdamboec tabadnu, qesho: Padi. Cueschitono, quequin icsamenëdaidi nēbi utsi uanuna. Naden chuinanuna. Mimbi tantiaidi chuita. Utsibon chuisho tantiate bonquin tantia. Dacuëdenquiocquin nata. Mibi cuestiapimbo iquebi - quequin chuinanuna. Adec matses utsi-utsiquetsëcquiec nuquibi bëdamboec tabadtsiashe - quequin chuipanëdash nidaid abitedinoësh cho-choquidon.

Adashic: - Bëdamboec tabadnuna, quequin neid chiaid isun chuiquid dapan: Ai, bëdamboen chiacpadec tabadnuna, aton matses chiac bëdambo ictsiash. Aid chuiquid dapa caic: Icsambo iqueque. Cuesunechitono, utsibon cac icsambo ictsiash - quequin chuipanëdash nidaid abitedinoësh cho-choquidon.

Adashic: - Nuquibi bëdambo iquec, cananuna - quequin chuipanëdash nidaid abitedinoësh cho-choquidon.

Adashic: - Bëdamboec tabadnuna, quequin chiac bëdambo ictsiash. Matses abitedimbo bëdambo iquec. Dada bëdambo iquec. Chido bëdambo iquec. Bacuëbo bëdambo iquec, quequin chiac bëdambo ictsiash. Padi.

Mimbi chiac padomboen bëdamboen nainda. Cueschitono quequid chieshëmënnquid icsambo ictsiash. Adquid nibëdnubi matses abitedi dada uaquin mëquiacac bëdambo ictsiash. Adembidi dauë menebanac bëdambo ictsiash. Adecbidi piasenquio yec bëdamboec tabadac bëdambo ictsiash - quequin chuipanëdash nidaid abitedinoësh cho-choquidon.

Adashic: - Nëmbo cho-choquidotedi aton nidaidën nishun aton matses nuqui chiondaid chuituidac: Ai, mimbi chiacpadec bëdamboec tabadnuna, quequin chiac bëdambo ictsiash - quequin chuipanëdash nidaid abitedinoësh cho-choquidon.

Adashic: - Nuqui chuiboed matses abitedimbo tantiamiac bëdambo ictsiash - quepanëdash. Aidedba chuipanëdash.

Nuqui Chuiboed Bëdambo Iquec, Quiash

Nidaid abitedinoësh cho-choquido: - Nuqui chuiboed matses abitedimbo tantiamenuna. Tantiamiac chuiquid dapabon: Ai, adec bëdamboec

tabadcuenuna, cac bēdambo ictsiaſh. Bēdamboec tabadcuenuna, cacpadec matses abitedi bēdamboec tabadac bēdambo ictsiaſh - quequin chuipanēdash nidaid abitedinoēſh cho-choquidon.

Chiaid 1

Chidon tishaido yec matses abitedimbo bēdamboec isnanac bēdambo ictsiaſh. Chieſhnac icsambo ictsiaſh. Abitedimbo bēdamboec tabadac bēdambo ictsiaſh. Shubu abentsēcquidēn tabadac birnboec abitedi tabadac bēdambo ictsiaſh - quequin chuipanēdash nidaid abitedinoēſh cho-choquidon.

Chiaid 2.

Nēid dada uaid isash abitedi bēdamboec isnanac bēdambo ictsiaſh. Ēbi padquid con matsesuidtsēqui bēdambo iquec. Matses utsibo icsambo iquec, quenquo yec: Con matses bēdambo icnuc utsibotsen bēdambo iquec, cac bēdambo ictsiaſh. Adernbidi: Embentsēqui bēdamboen tantiembi. Utsibo abitedishun icsamboen tantiec, quenquoēquin:

Chieſhēnquiocquin ma ambi tantiaidi napanu cac bēdambo ictsiaſh. Chidobi bēdamboen istiapimbo iquebi, quenquiocquin chidotsen bēdamboen isac bēdambo ictsiaſh. Chuiquid dapambi nēid chiaid niacbidanquin aton matses chieſhēnac icsambo ictsiaſh - quequin chuipanēdash nidaid abitedinoēſh cho-choquidon.

Chiaid 3.

Matses utsibo yuainquo yec, cuesnanenquo yec quec bēdamboec tabadnuna, cac bēdambo ictsiaſh - quequin chuipanēdash nidaid abitedinoēſh cho-choquidon.

Chiaid 4.

Matses utsibo min matsesbēta yuainquiocquid. Yuac icsambo ictsiaſh. Adembidi matses utsibo min matsesbēta beshun yuamequin menenquiocquid. Yuamenun meniac icsambo ictsiaſh - quequin chuipanēdash nidaid abitedinoēſh cho-choquidon.

Chiaid 5.

Matsespenquo yacimbocnuc aton matses bēta matses utsibo icsauainquiocquid. Icsauac icsambo ictsiaſh - quequin chuipanēdash nidaid abitedinoēſh cho-choquidon.

Chiaid 6.

Atoda nidaidēn nidacſho anocquidon: Con matses chuiquid dapan chiaid ley caid nata. Niacbidanſho juez caidēn ēbi yac padomboembidi cuidtsiaſh, cac bēdambo ictsiaſh - quequin chuipanēdash nidaid abitedinoēſh cho-choquidon.

Chiaid 7.

??Mitsicquid nidaidēn tabadquid nec? Aton nidaidēn tabadquido chuiquid dapan chiaid ley caid abitedishun nac bēdambo ictsiash. Aidēn chiaid niacbidansho juez caidēn cuidac bēdambo ictsiash. Nēid chiaid niacbidanquin matses utsi caic: Matsespenquo mibi nec. Mibi bēdamboen istiapimbo iquebique. Mēyanu, quequin ambembi nac icsambo ictsiash. Cuidte chuiquid juez caidēn matses abitedimbo: Mibi matses nec. Con matses nacpadomboembidi mibi naimbi, cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 8.

??Midacquid matses nepec? Aton nidaidēn tabadquido chuiquid dapabon chiaid nac bēdambo ictsiash. Aid chiaid niacbidanquin utsibo icsauasho isun juez caidēn bemeshun cuidac bēdambo ictsiash - quequin chuipanēdash nidaid abitedinoēsh cho-choquidon.

Chiaid 9.

Nēid chiaid niacbidanquin ambembi matses quēne uac icsambo ictsiash. Adembidi ambembi chieshēnquin matses aton nidaidēnshun cuemiac icsambo ictsiash - quequin chuipanēdash nidaid abitedinoēsh cho-choquidon.

Chiaid 10.

Chuiquid dapabon chiaid ley caid niacbidanosh. Icsaosh, caid beshun juez caid yacno buanquin. Anoshombi matses daēdpenshun isnuc juez caidēn chieshēnenquiocquin chuimequin. ??Atotsi nao? quequin chuimequin. Ashumbi aid isquidtsen chuimequin. Adoshombic: Abimbo caosh. Icsaosh, qeshun cuidquin. Icsabicshobi: Icsabi iqueque. Cuidtiapimbo iquebi. Ma nidnu, cac bēdambo ictsiash. Cuidte chuiquid juez caidēn chieshēnenquiocquin abimbo cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 11.

Chuiquid dapabon chiaid ley caid niacbidanosh. Icsaosh, caid beshun cuidte chuiquid juez caidēn uesquin chuimiabi badedi: Mibi icsaque. Mibi cuidnu, cac icsambo ictsiash. Chata. Utsibon tantianubi chuimiabi icquin: Icsambo iquec, catiapimbo iquebi. Chuimebono, juezēn cac bēdambo ictsiash.

Chuiquid dapabon chiaid ley caid niacbidanacsho juez caidēn chuimeshun cuidac bēdambo ictsiash. Chuiquid dapabon: Aden naic icsambo ictsiash. Adoquid naden cuidquid, quequin chiacmaid nacsho: Icsambo iqueque. Cuidnu, cac icsambo ictsiash. Aidon chiaid niacabiesho cuidac icsambo ictsiash - quequin chuipanēdash nidaid abitedinoēsh cho-choquidon.

Chiaid 12.

Nidaid utsin-utsinquetsēcquiequidēn chuiquid dapabon: Nadquid icsambo iqueque. Cuidnu cac bēdambo ictsiash. Nēidic: Mimbi tantiaidi nainda. Embi chiac padomboenuidtsēqui nata, quec chieshēmēnquid. Nēidic: Min nabobēdi bēdamboec tabadenda, quec chieshanquiequid. Nēidic: Ambi tantiaidēn iste dada uaid isnushe. Beshun secanuna, quequin dada uaido beshumēnquid. Aided icsambo iquec, quequin chuiquid dapabon chiac bēdambo ictsiash - quequin chuipanēdashe nidaid abitedinoēsh cho-choquidon.

Chiaid 13.

Nidaid utsin-utsinquetsēcquiequidēn chuiquid dapabon nadoac bēdambo ictsiash. Nēid nidaidēn tabadquid: Capucuenenu, quesheo tantiashun: Ai, capucueneta, cac bēdambo ictsiash. Adembidi: Shubu utsin manēdnu, quesheo: Ai manēdta, cac bēdambo ictsiash, quequin chiac bēdambo ictsiash.

Nadembidi chiac bēdambo ictsiash. Nēid nidaidēnoēsh nidendabi, quesheo, Ai, nidta, cac bēdambo ictsiash. Nidenda. Cueschitono, shēpi, cac icsambo ictsiash. Padnuen: Nēid nidaidēn choaindabi, quesheo, Ai, chota, cac bēdambo ictsiash. Padnuen: Choenda. Cueschitono, cac icsambo ictsiash - quequin chuipanēdash nidaid abitedinoēsh cho-choquidon.

Chiaid 14.

Nidaid utsino cuenash: Con nidaidēn tabadquidēn ambembi chiesēnac cuenobique. Mīn nidaidēn tabadnu, quesheo: Ai, nēmbobi quenenta, cac bēdambo ictsiash.

Padnuen aton matses chuiquid dapabon ley chiaid niacbidanec: Cuidnushe, quianec nidaid utsin cuensho: Ai, nēmba quenenta, cac icsambo ictsiash. Adembidi ēmbi chuiboed niacbidanec: Cuidnushe, quianec nidaid utsin cuensho: Ai, nēmba quenenta, cac icsambo ictsiash - quequin chuipanēdash nidaid abitedinoēsh cho-choquidon.

Chiaid 15.

Acte amē ēquē cuēma utsiuc tabadquid: Peruano nebi, quesheo Peru yacnocquid ēhuiquid dapan: Ai, Peruano mibi nec, cac bēdambo ictsiash.

Padnuen acte amē oquē cuēma utsiucquid: Brasilero nebi, quesheo Brasil yacnocquid chuiquid dapan: Ai, Brasilero mibi nec, cac bēdambo ictsiash. Padnuen nidaid utsin tabadquid: Nēid nidaidēn icquidquio nebi, quesheo: Ai, adquid mibi nec, cac bēdambo ictsiash.

Aton nidaidēn tabadquid: Nēid nidaidēn icquid mibi catiapimbo iquebi. Con matses mibi cainqujo iquembi, ambembi cac icsambo ictsiash.

Padnuen aton nidaidēn tabadquid: Nēid nidaidēn icquid icboedi nēbi nidaid utsin manēdash aid nidaidēn icquid yanebi, quesheo ambembi chieshēnquin: Padi. Aid nidaidēn icquid mibi catiapimbo iquebi, cac icsambo ictsiash - quequin chuipanēdash nidaid abitedinoēsh cho-choquidon.

Chiaid 16.

Ashumbic padpiden: - Dada caniaidi: Con bacuē tishmenuen con matsesēn champi bednu, quesheo: Ai, adota, cac bēdambo ictsiash. Caniaid utsibi: Con bacuē tishmenuen matses utsin champi bednu, quesheo: Ai, adota, cac bēdambo ictsiash. Padnuen chido caniaid: Con bacuē tishnuen con matses bedmenu, quesheo: Ai, adota, cac bēdambo ictsiash. Chido canjaid utsibi: Con bacuē tishnuen matses utsibi bedmenu, quesheo: Ai, adota, cac bēdambo ictsiash. Dadabi: Con chidobēdi bēdamboec tabadnu, quesheo: Ai, adta, cac bēdambo ictsiash. Chidobi: Con bēnēbēdi bēdamboec tabadnu, quesheo: Ai, adta, cac bēdambo ictsiash. Chido aton bēnēn yuapenquio nec. Dadabi: Embi con chido caboedi icsasho isun con chidopenquio canu, quesheo, Ai, adota, cac bēdambo ictsiash. Chidobi: Embi con bēnē caboedēn chieshēnoshi. Aidi nianu, quesheo, Ai,

adota, cac bēdambo ictsiash.

Nidaid utsin-utsinquetsēcquieccquidēn chuiquid dapabon: Dadabi: Aton bēnē ictiapimbo iquebi, qesho bedmenda. Adecbidi chidobi: Aton chido ictiapimbo iquebi, qesho bedmenda. Padnuen dadan: Mibi bednu, cac: Ai, ēbi bed, cac bēdambo ictsiash.

Nidaid utsin-utsinquetsēcquieccquidēn chuiquid dapabon: Dada aton nabobēdi bēdamboec tabasho isash: Bēdambo iquec, cac bēdambo ictsiash. Chieshēmēnquidēn aton chido beshunac icsambo ictsiash. Adembidi aton bacuēbo beshunac icsambo ictsiash. Adoquid cuidnuna, quequin chiac bēdambo ictsiash - quequin chuipanēdash nidaid abitedinoēsh cho-choquidon.

Chiaid 17.

Nidaid utsin-utsinquetsēcquieccquidēn chuiquid dapabon: Amplabicquid: Con nabi nec, qesho: Ai, mitsa na nec, cac bēdambo ictsiash.

Adembidi: Utsin nabēdi con na nec, qesho: Ai utsin nabēd mitsa na nec, cac bēdambo ictsiash.

Adashic: Ancanquidēn utsin na beshunac icsambo iquec. Adembidi utsin na ampiac icsambo iquec, quequin chiac bēdambo ictsiash - quequin chuipanēdash nidaid abitedinoēsh cho-choquidon.

Chiaid 18.

Nidaid utsin-utsinquetsēcquieccquidēn chuiquid dapabon: Nēmbocquid: Aden tantiembi, qesho: Aden tantiasho mibi cuesunechitono, shēpi, cac icsambo ictsiash. Utsibi: Matses uaquid abentsēqui Nuquin Papa iquec, qesho: Adquid cuesunechitono, shēpi, cac icsambo ictsiash.

Utsibi: Nuquin Papa caid nibēdec, qesho: Adquid cuesunechitono, shēpi, cac icsambo ictsiash. Utsibi: Podobitsi daēdpen tantiaquidquio nebi, qesho: Adquid cuesunechitono, shēpi, cac icsambo ictsiash. Padnuen: Podobitsi daēdpen tantiaquid icboedēmbi nēbi utsi uaimbi. Nēbi Nuquin Papa tantiaquid nebi, qesho: Adquid cuesunechitono, shēpi, cac icsambo ictsiash. Utsibi: Embi Nuquin Papa caid tantianuec shubun puduedash tabadcuedednu, qesho: Padi, cuesun secachitono, cac icsambo ictsiash. Utsibi: Embi Nuquin Papa caid tantianuec abentsēqui tsadnu, qesho: Padi. Cuesunechitono, cac icsambo ictsiash. Padnuen: Embi Nuquin Papa caid utsibo chuibanu, qesho: Asho mibi cuesunechitono, cac icsambo ictsiash. Utsibi: Embi Nuquin Papa caid tantianuen nanu, qesho: shēpi cac icsambo ictsiash, quequin chiac bēdambo ictsiash - quequin chuipanēdash nidaid abitedinoēsh cho-choquidon.

Chiaid 19.

Nidaid utsinutsinquetsēcquieccquidēn chuiquid dapabon: Matsesēn ambibi tantiaid chuisho: Chuisho cueschitono, shēpi. Chēn, cac icsambo ictsiash. Utsibi: Utsin chuisho tantiatanu, qesho: Nisho isun mibi cuesunechitono, shēpi. Chēn, cac icsambo ictsiash. Padnuen: Maquinian onquequin utsibo chuibanu, qesho: Chēn. Cuidchitono, cac icsambo ictsiash. Utsibon iste dada uanu, qesho: Chēn. Dada uainda, cac icsambo ictsiash. Nidaid utsin tabadquid chuinu, qesho: Chēn. Anocquido chienda, cac icsambo ictsiash, quequin chiac bēdambo ictsiash - quequin chuipanēdash nidaid abitedinoēsh cho-choquidon.

Chiaid 20

Nidaid utsin-utsinquetsēcquieccquidēn chuiquid dapabon: Con nidaidēn tabadquid: Aidobēdi bēdamboec tabadnu, qesho: Ai, adta, cac bēdambo ictsiash. Adembidi: Shubun tsaduedash bēdamboec onquecuedednu, qesho: Chēn. Cuidchitono, cac icsambo ictsiash.

Adashic: Utsibi: Aden tantiaquidobēd tabadtiapimbo iquebi, qesho: Baded cho. Choenquiocsho cuidchitono, cac icsambo ictsiash, quequin chiac bēdambo ictsiash, - quequin chuipanēdash nidaid abitedinoēsh cho-choquidon.

Chiaid 21.

Nidaid utsin-utsinquetsēcquieccquidēn chuiquid dapabon: Miqui chuiquid ictiadquio iquebi, qesho aton matsesēn: Ai, ēbi chuiquid icta, casho utsibo daēdpatsēcshun: Padi, cuesunechitono, shēpi, cac icsambo ictsiash. Padnuen: Miqui chuiquid ictiadquio iquebi, qesho aton matsesēn: Padi caqui chieshēnquin: Padi, caquido cuesun secachitono cac icsambo ictsiash.

Chuiquid dapabon: Nuquin matses abitedi nashununa. Aton podquedēn uaquinc, aton dauēchoquid icmequinc, aton dada uaid ismequid icmequinc canuna, cac bēdambo ictsiash.

Matses daēdpenshun: Embi chuiquid icta, cac aidi chuiquid icmiac bēdambo ictsiash Padabi yac icsambo ictsiash. Utsibombi: Aidi chuiquid bēdambo ictsiash, quequin utsibo ismenquiocquin aid cuēmēdquid dada uashun sandoquin. Adoshombi matses abitedishun ambi tantiaid dada uatanquin sandoacsho sandoaid beshun tambanquin. Adoshombic: Mibi cuēmēdquid matses daēdpenshun dada uaque. E'bi chuiquid icta, cain. Padnubi matses utsibon aton matsesēn nac padomboen chuiquid dapa icmequin. Adoac bēdambo ictsiash - quequin chuipanēdash nidaid abitedinoēsh cho-choquidon.

Chiaid 22.

Matses abitedi bēdamboec tabadac bēdambo ictsiash. Piasenquio yec dacuēdenquio yec tabadac bēdambo ictsiash. Nēid nidaidēn icquido chuiquido nidaid utsin icquidobētan chuiquin: Matses utsi-utsiec abitedimbo bēdambo iquec. Aton piucquid bedmenuna. Bēdamboec tabadmenuna. Min matsesi bēdamboen istiapimbo iquebi, cainquio icnuna, cac bēdambo ictsiash - quequin chuipanēdash nidaid abitedinoēsh cho-choquidon.

Chiaid 23.

Nidaid utsinquetsēcquieccquidēn chuiquid dapabon: Nuquin nidaidēn tabadquido: Chuiquid dapan chiaid ley caid niacbidanenquiocquin piucquid bednuen naimbi, qesho: Ai, adota, cac bēdambo ictsiash. Padnuen piucquid bednuen nashunaidon: Chata. Tiboeta. Miqui mēyadeque, abi nashunquido cac bēdambo ictsiash. Chonoaoanquidquio icsambo ictsiash. Utsibi: Piucquid benuen naimbi, cac: Naic cho, caquid nibēdsho isun chuiquid dapan: Nanu, cauidquido piucquid meniac bēdambo ictsiash.

Padnuen: Naic cho, cac daēdpen chonoadacsho piucquid menequin. Chonoadquido abitedishun tauac padquido aitedishun nainacsho piucquid ated-atedbidi menebaniac bēdambo ictsiash.

Ma aton nabo pemequinc, dasiuinquinc, shubu uaquinc canu, quequin chieshenquiocquin chonoadquid piucquid daēdpen meniac bēdambo

ictsiash. Piucquid daëdpatsëc meniac aton nabo pistsëc pemequinc, disiuinenquiocquinc, shubu uatsëcquinc cac icsambo ictsiash. Adec icsambocsho isun chuiquid dapan: Piucquid menenuna, cac bëdambo ictsiash.

Chonoadquido: Ebi chonoadac padec chonoadquidobëd onquecuedednuna. Ëbi chonoaoaquidon piucquid daëdpatsëc menesho chushcanuna, quesho: Chën. Onquecuededenda. Cuidchitono, cac icsambo ictsiash. Ai, miqui chiac padota, cac bëdambo ictsiash - quequin chuipanëdash nidaid abi tedinoësh cho-choquidon.

Chiaid 24.

Tibocamianenquiocquin chonoaoanquiac icsambo ictsiash. Padnuen: Padi. Nëbadiadash tiboenuna, cac bëdambo ictsiash. Dia ëeriado caidën matses abitedi tiboequid. Asho Chonoaoaquidën dia ëeriado caic: Aid ushëmbi chonoadacimboecnuc adted piucquid menenu, cac bëdambo ictsiash - quequin chuipanëdash nidaid abitedinoësh cho-choquidon.

Chiaid 25.

Aton pete icnuc, aton dashcute icnuc, aton shubu icnuc, aton dauë icnuc aton nabobëdi matses bëdamboec tabadtsiash. Adac bëdambo ictsiash. Utsibi chonoadtiapimbo icquin aton piucquid bedtiapimbo yec bëdamboec tabadtiapimbo iquec. Nëidtedi matses chonoadtiapimbocquido nec. Nëidic Naid cho, cacmaido. Nëidic dada icsatsaido. Nëidic niantebo. Nëidic tsusiompibo. Nëidic machompibo. Aidedi chonoadtiapimbocsho isun chuiquid dapan aton piucquid meniac bëdambo ictsiash.

Ani aton bacuëbobëd tabadquido bëdamboen isquin bëdamboen dayun uac bëdambo ictsiash. Bënën tishmiaido bacuëbo bëdamboen isquinc abembi uaidën tishaidotsen bëdamboen isquinc cac bëdambo ictsiash - quequin chuipanëdash nidaid abitedinoësh cho-choquidon.

Chiaid 26.

Nidaid utsin-utsinquetsëcquiequidën chuiquid dapabon: Con matses dada uate shubun puduedash mëquiadnu, quesho: Ai, adta, cac bëdambo ictsiash. Taëyec mëquiadquid dada uate shubun puduedacsho: E'~mbi mibi mëquiacsho ëbi piucquid mene, cac icsambo ictsiash. Yuecash mëquiadquidën mëquiacquid piucquiud meniac bëdambo ictsiash. Bacuëbo abitedi dada uaqin mëquiacnuna, cac bëdambo ictsiash. Dada uaic bëdamboec mëquiadash: Dada uaid daëdpenquio tantiatiadquio iquebi. Dada uate shubu utsin puduednu, quesho: Ai, adta, cac bëdambo ictsiash. Utsibi nacnenec mëquiadash: Nacnenquidënquio ismesho istanu, quesho: Ai, adota, cac bëdambo ictsiash.

Dada uate shubun puduedshun mëquiacquidon: Matses utsi-utsinquetsëcquiec iquec. Abitedimbo bëdambo iquec. Utsibo abitedi bëdamboen isnuna. Chieshnanenquio yec cuesun secananenquio icnuna. Adec bëdamboec tabadnuna - quequin mëquiadquido bëdamboen chiac bëdambo ictsiash.

Amëbëtan anin: Nëid dada uate shubunoshon ~ëquiacquidën ëmbi tantiaidbidi chioshe. Ambo con bacuëbo yuednu, quesho: Ai mimbi chiac padota, cac bëdambo ictsiash - quequin chuipanëdash nidaid abitedinoësh cho-choquidon.

Chiaid 27.

Con matses cuëdënacno istanu, qesho: Ai, mimbi chiac padota, cac bēdambo ictsiash. Utsibi: Con matses mamēnacno istanu, qesho: Chēn. Cuidchitono, cac icsambo ictsiash. Utsibi: Con matsesēn nacnenaid istanu, qesho: Ai, adotanta, cac bēdambo ictsiash. Utsibi: Con matsesēn nacnenaid bednu, qesho: Chēn, mibipadquid bedmetiapimbo iquebique, cac icsambo ictsiash.

Dada uaquido nacnenquidobēta bēdamboen isac bēdambo ictsiash. Utsibombi ambi tantiaid dada uaquid. Utsibombi ambi tantiaid nacnenquid. Adoquidon: Embi nacnenaid bednuen ēbi piucquid mene, qesho bedquin piucquid meniac bēdambo ictsiash. Padnuen utsin dada uaidi caic muaquido: Embimbo dada uaid nec, qesho chuiquidēn cuidac bēdambo ictsiash. Muaquid utsibi: Embibo nacnenaid nec, qesho adembidi chuiquidēn cuidac bēdambo ictsiash - quequin chuipanēdash nidaid abitedinoēsh cho-choquidon.

Chiaid 28.

Nidaid abichobi icquidēn tabadquido chieshnanenquio yec bēdamboec tabadac bēdambo ictsiash. Matses aton matses utsibobēdi chieshnanac icsambo ictsiash. - quequin chuipanēdash nidaid abitedinoēsh cho-choquidon.

Chiaid 29.

Nidaid utsin-utsinquetsēcquieccquidēn chuiquid dapabon: Min shubu yacno bēdamboec tabadtiadquio yec bēdamboec nashunanta, cac bēdambo ictsiash.

Chuiquid dapabon aton matses bēdamboec tabadte bonquin chiaid aton matsesēn nac bēdambo ictsiash. Chuiquid dapabon aton matses mēyante bonquin chiaid aton matsesēn niacacsho cuidac icsambo ictsiash.

Embi chuiboed isun: Bēdamboec tabadnuna, cac bēdambo ictsiash. Padnuen ēmbi chuiboed ismeshun: Embi naiduidi nanu, shēpi, cac icsambo ictsiash - quequin chuipanēdash nidaid abitedinoēsh cho-choquidon.

Chiaid 30.

Nēid dada uaid isash, Icsa uanquionona, cac icsambo ictsiash. Padnuen nēid dada uaid isun, Nidaid abichobi icquidēn tabadquidobēdi bēdamboec isanec bēdamboec tabadnuna, cac bēdambo ictsiash - quequin chuipanēdash nidaid abitedinoēsh cho-choquidon.